



高皇帝御製文集卷第十八

祭文

奠忠襄王李察罕文

草之勁者非疾風不顯人之忠者非亂世難名爾李將軍當中原擾攘元政不綱大臣竊命守將擅兵于外是致干戈鼎沸國勢日危人將以爲元無人矣何將軍之忠義倡農夫爲三軍拔智勇以上聞頒爵以官之明其分數義旗舉而兵興齊魯強兵僅能固守爾能陳兵於野請命於朝進退有方君命是聽當是時忠心昭如五曜號令嚴若冰霜所以動天地而感

鬼神以其忠之所致夫何兵旣勝志少盈納逋逃釋
有罪忠義漸虧鬼神鑒見俄而禍膺不測殞於敵手
然忠未終而姦未顯壽不期年果屬何耶莫不竭忠
以身先而致是歟抑人臣之有將而若此歟噫予數
其事而酌之猶生之對也靈酣而往予紀而歸誅心
之言爾其聽乎

祭柏子潭龍文

昔兵駐滁陽適當秋首正禾苗暢茂時乃無雨軍民
惶惶予亦甚沮詢及土人言豐山之東潭有神龍每
遇旱患禱之輒應予親詣懇切於祠神不我棄後三

日乃荅俄風生萬壑倏墨雲遍於太虛須臾霖雨濟
我軍民然雖去此而常想二十年間凡旱患猶極目
于神方今年群牧在斯掬淵泉飲有告我者蛇入神
祠予想非蛇必神有所爲而至豈牧豎褻瀆而有所
惡歟抑神心悅而至歟嗚呼倏然忽然予所不知特
遣官致祭并禁掬水神其鑒焉

祭平章李思齊文

卿昔爲民中原時逢世亂獨能仗義施仁挺身奮臂
率義旅以保關中臣元有年矣何元綱不振社稷陵
替卿尚能固守臣節斬我行人忠臣之義可謂盡矣

然大厦將傾非一木可支未幾胡君遁去中原土地復我漢人朕遂為生民主當是時漢人棄立隴從胡為我中國仇讐至今身膏草野骨委沙漠唯卿退守臨洮心思父母之邦義忠族類是以全境保民助我成功今七年矣夫何久疾不痊以致長往噫握兵一世又得善終亦人之所難卿能如是豈不美哉朕聞卿歿不勝痛悼今遣某官用牲醴致祭卿其享之

祭淮安侯華雲龍文

昔皆民人爾因世亂歸朕今有年矣雖無獨建奇功隨衆勤勞多著念爾勲舊特加侯爵朕以燕地之

托爾任守務在軍安民樂委以燕相更望輔弼何期數年間軍勞民怨詢其所以乃爾巨府院擅工役害衆成家書云作善降之百祥作不善降之百殃推爾之故莫不去賢而近愚忘所以報神人共怒致令如是歟抑爾前生壽數有定而若此歟然當在生之時可為善而不為今事已往其幽冥處判無私已在目前是非還自知否朕有誓曰生封侯而死謚以公著為常典爾生前守爵而害官民法不當公止葬以侯禮且薄情不厚所以責之也爾其聽之尚饗

祭滁陽王文

曰曩者群雄鼎沸之時民不堪命王乃奮臂定遠拔
濠城而守之朕方從軍幾被他人所害惟王能活我
致有今日盡平天下家國已成再生之恩終世難忘
今者督工鳳陽道經環滁瑩祠在斯遣官致祭尚饗
中都祭開平王文

曰思爾相從於今二十有二年矣然爾去世倏經五
載若觀聽容聲止有一十七年耳當前十七年間東
征西伐櫛風沐雨奮不顧身開拓疆宇朕知爾心至
如嚴號令帥三軍摧堅撫順英風冠世海內知名其
為丈夫也莫不慨然心至生也如是死也封王寰宇

既稱祖宗光耀子受公爵女嗣后基今古如是者甚
不多見今年夏四月朕親至中都驗功勞公侯相從
護駕者群然行失爾隊列亡爾班使朕心惻然因祠
在斯特以牲醴享爾如生爾之昔友皆隨來奠神其
不昧尚饗

祭先陶神文

神於初世治陶尤精埏埴為器器治成功今古不易
用且無窮

神之公志有若是耶今也命匠施陶為朕所用特遣
官致祭更祈聽役之人身無他患始終完成是其禱

也神其鑒之尚饗

祭温州千百戶文

曰歷代設兵衛在乎禦侮職於斯者則有櫛風沐雨
野宿風餐披堅執銳之勞以其臨陣也則有捨父母
忘妻子奮不顧身乃能克敵功著史冊名冠天下如
此者實古名將已然之事是致家榮貴國磐石至今
昭昭朕統天下以來中國方寧法前人之所爲守在
四夷自洪武初至今倭夷數爲寇於海濱生離人父
母妻子損傷物命特勅爾等聽將軍靖海侯吳楨令
舟營海上以靜方隅夫何朕政有缺天風大作怒號

於滄溟之上爾乃恪恭將命信地弗違是有檣傾楫
摧舟碎爾亡然生死之道世人之常得其死者旣廣
不得其死者甚多今爾諸人爲國爲民而殃及於身
事雖如是不爲汎然訃音一至朕將何措雖感傷於
衷爾生安得而歸故特遣某官臨海設壇致祭仍命
僧衆脩設道場追薦爾魂使有所歸凡有官者則祿
爾子孫軍士父母妻子則給糧養贍靈其有知承此
祭享

祭保誌法師文

昔者師能出世異人性備六通景張佛教使兇頑從

化善者愈良及其終也擇地於鍾山之陽陰其宅而
居之經今八百六十七年今朕建宮在邇其為師焚
脩者俯而視之因勅中書下工部造浮圖於山之左
今將完成徙師於是於戲漏盡毋生人我劫終勿墮
塵埃惟師神通尚饗

龍江祭太歲諸神文

為出師征西南夷

上帝好生凡有國者必欽承而效之則民安物阜邇
年以來西南諸夷歲為邊民患斯患也稱自堯舜以
至于今化弗循教征弗畏威蓋恃崇山而固險倚林
木之深叢跳梁出沒虐良民而傷生今遣江夏侯周

德興克征南將軍進取散茅等洞安慶侯仇成克征
南副將軍征取容美等洞以及散茅其遣將發兵必
欲摧堅撫順以靜西南兵行特專昭告神其鑒之尚
饗

禱雨咨京都城隍文

上帝
天久不雨特將過矣實予之罪首夏亢陽本欲禱於

后土慮恐煩聽以致因循至今良民失望皆有憂心
予不收徑達

上帝

御集卷之六十一
后土於今月十一日親告于鍾山之神望神轉達於上帝

后土惟京都城隍之神先期與報至日祝焉

禱雨有應謝鍾山神祭文

天久不雨烝民懷憂予將告神而未施乃先城隍必城隍善予所云故告旱之辭未訢神其我知即日大雨時行今來詣山而謝神神正無私祐我烝民謹謝

祭漢蔣秣陵尉文

今年仲季夏間

上帝震怒皆朕失奉

天心作為太過以致朝廷多事軍民弗安既受

帝命遑遑無措知無不改然未知

天意曾無回乎俄爾有來告者當

帝怒時神祠亦有干焉朕思神非朕諂朕非諂神朕凡無知陰道以情理推之必因新建而人愆累神然皆朕不能斷而致是今既工成而有

帝責之跡本不敢完既成而廢恐失人瞻望特依跡完之朕非佞神嘗聞向者福善禍淫每皆當焉朕所以美神已往陰功無諂毋敢弗扶陰而化民故時祀之今完之欲民為善耳他無所干牲醴之奠神其饗

之

祭外祖揚王文

孫起布衣於淮甸漸群雄之來從凡二紀於茲其間
摧堅撫順歛跡英雄平禍亂於寰宇播聲教於八埏
安黔黎於市村是以尊稱華夏耀揚六軍握九伐之
威以鎮頑積四海之利以賞善斯非

上天

后土之昭鑒

海嶽之效靈

家祖

外祖累世皆積陰功奚若是耶每念

外祖之靈必欲親詣年思月想終不遂行為其國事

浩繁弗克詣前今特命外從孫曹國公李文忠以牲

醴之奠獻於陵所以建靈堂及云追封

外高曾祖考妣之由惟我

外祖英靈不昧尚饗

祭外高曾祖考妣文

非累世陰功奚生我

母必積德廣深感格

天地福加於我然幾暇常思無由展報為其育

御集
母之深恩曠如

昊天

后土雖欲報勞焉能及之今節屆孟秋特專內臣奉
御杜亮齋衣儀詣陵告祭尚饗

祭仲姊曹國長公主文

感傷

父母鞠育之恩思惟

姊孝

父母之專時刻有省油然動心更思

父母初逝兄弟相離

姊我是別當是時也各天一方悲傷痛切惟鬼神知
我此時雖居至尊未嘗有忘今也節屆孟秋特遣內
臣奉御徐慶齋衣儀詣

姊墳所

姊其享牲醴受衣儀悅

父母之英靈尚饗

祭宋威武軍承宣使張淵文

世物皆消長朕疑格以觀之然其所以然矣再閱古
而目今聽智賢之所云乃有不磨者惟功德著於人
神而能永焉昨宰營繕者入奏謂爾威武軍承宣使

張淵陰宅其下既開而見辭知捨身以捍患每禦侮以防姦當善終於淳熙甲午之孟秋爾君念忠勤而不忘遂勒石於壙今朕勅宰營繕者鼎新陰宅於是於戲捨身而身存堅忠而名著其不磨也而謂忠焉者矣故茲奠祭爾其享之

祭濟寧侯顧時文

嗚呼訃音來報云及爾亡遂感傷終始發究心之無窮致涕淚欷歔而不已又忽歡動衷情謂識千古之將有所不及夫何如哉蓋將能成功而不為敵所辱朝野無議但嬰微疾遽然長往此所以名世良臣爵及子孫祿榮於家斯善終之萬幸也然死生之道今古不異世人之常於戲摧堅撫順被甲習於年年其報效忠勤日星昭著靈其有知以享斯祭

祭兩浙運使李世傑文

爾昔壯時以武從事東征西伐摧堅撫順爾皆有功剛正不屈公多在职賄賂無知所以命職莫海他官弗肩錢糧辦集已及數年正當高壽之時恐精力不繼遂令致仕養老於家曩者王溥不遵朕諭累犯憲章朕命釋之今年汪信來首云溥非為爾為前導朕聽斯言必奸臣共謀者因是罪及傍人者衆無乃過

乎事未久而爾亦逝矣疑其爲此而有愆歟然或真
僞彼此朕所不知今爾臨葬之時特差內臣奠而囑
之爾其尚饗

祭千戶夏以松文

曩元之季海內分爭英雄者非一擅聲教罔知天命
者多惟爾以松思鄉里之切遂倡義旅自維揚渡江
東來助朕征行以致有功前數年福期高壽命從子
襲爵使爾優游以終天年邇聞訃音一至思於相從
甚至感傷今特致祭靈其不昧

祭都督何德文

爾自聽命以來勤勞累著功業愈多朕將報功賜以
巨賞何期但嬰微疾遽然長往然壽雖未足歸去人
歡何也以其爲將而功著朝野不爲敵所辱而得善
終豈不善之善者也

祭四輔官安然文

爾中土之士昔當元末從事義旅効力於元職掌兵
夫及元運終大將軍長驅齊魯當是時爾守齊東爾
爲中土之士祖宗丘隴在焉所以棄胡歸我其來甚
誠朕於爾嘉是以數授之以重任每臨方面累有極
刑之犯者三朕嘗釋之前年爲坐視胡惟庸陳寧爲

惡意已同姦朕思來歸之美仍前釋之昨爲朝無人
用復召爾來想必加誠事朕何期鬼神鑒焉爾懷自
愧之疾遽然幽往朕觀所以必有究乎然朕尚思初
歸之意猶加牲醴之奠

祭營田使馬世熊文

嗚呼長者之歸也盡

天之道乎所以天之道禍亂不作於善災害不萌於
良使得善始善終

天之道也爾世熊昔役公門未嘗輕惑於人及帥義
旅度量宏深士卒感恩時當高年前月爾孫來奏云

老疾少侵是月歸奏乃知訃音嗚呼傷哉嗚呼快哉
且傷傷善人去世君子誰同快快於善始善終而盡
天理也朕務甚失遣使問疾時已過矣特遣人祭於
靈所世熊有知尚饗

祭小張國公文

爾本有元之臣率衆闔外禦侮防閑偶爾部下生變
挾爾來歸實非本情居朕京師已有年矣今旣年邁
老疾日侵終於長逝特遣某官以牲醴祭奠爾其有
知尚饗

祭江陰侯吳良文

昔忠誠之士從君堅身許之志故犯患涉難以尊一人而安天下蒼生立高名不朽於史冊今古智人覽之無不歡心爾吳良從朕於擾攘之秋年馳月驅櫛風沐雨野宿風餐披堅執銳十有四載方封侯爵今又十四年矣正欲安享富貴何期爲營造而出嬰微疾而長往訃音至京朕何言哉然爲將之士忠於君而能平禍亂爲民作福而乃身得善終爾無憾矣遣人以牲醴致奠靈其不昧尚饗

祭孔希學文

曰三綱五常之道始上古列聖相承率脩明以育生

民至於中古將欲墜焉非先師孔子孰能脩明之今生民多福惟三綱五常之道備耳蓋世之大德者天地不淪沒人民無惡聲所以爲帝者師血食千萬世不泯子孫存焉朕以爾孔希學繼世焚脩未張斯教以顯爾祖何期訃音一至云及長往嗚呼襲封榮貴克保令終可無憾矣特遣使以牲醴致祭爾其享之

祭真人張正常文

繼出世法統僊度人禦災捍患機幹萬靈飛符仗劍轉斗移星雷神聽令妖魅潛形道光斯時貌正精英何乘鸞之去急控法印於上清今遣人奠以牲醴爾

其有知尚饗

高皇帝御製文集卷第十八

高皇帝御製文集卷第十九

古詩

春日鍾山

春吟鳥樹聽流泉澗下鳴泉鳴山谷迥迥處野人情
吾吟吟未已孰與春相迎相迎桃李花鶯燕鳴丁丁
麩麩盛蟠科寰宇樂民生

鍾山二首

遊山智盤旋俯谷仰奇巔松聲細入耳雲生水石邊
敲竹猿長嘯臨崖視鹿眠白鶴來天翅玄裳羽翼鮮
采芝携柱子任意恣踟躕野人溪外語黃鶯轉更便

山靜鳥歸疾林深紫暮煙樵還漁罷釣暢飲樂吾年

又

暑往鍾山阿巖幽清興多薰風自南發森松鳴弦歌
玄猿嘯白日丹鳳巢桐柯靈芝秀深谷祥雲盛嵒峩
樹隙觀天碧天青似綠荷迥聞樵採木曲澗浴珠螺
鳥樂山深邃予歡顏亦和野人逢問處樂道正婆娑

詠李白短歌行

漁樵較長短是非盈耳滿話盡誠渺茫山水各悠長
買臣文章中蟠溪望鬢霜兩人隔千古美惡皆一理
爭能在當時雄氣超掬桑能釣平紂暴休樵釣

自不泯黑白成殊光

題西施

天生兩奇絕越地多群山萬古垂青史西施世美顏
窈窕精神緩悠然體態閑笑擁丹唇臉皓齒出其間
一召起閭里句踐扼雄關伐謀應得志西浙徑親攀
鐵甲乘潮渡黃池兵未還

賜應奉陳溥歸關中

卿家居三川大河環蜿蜒吳山在西土華筍翠東天
涇渭水浩瀚終南固南邊藍田關倚碧秦嶺橫紫煙
太白峯高處炎天雪似綿今卿年本邁歸志不留連

火帝當時節浴途善保全陸行還謹宿乘舟渡深淵
智人能識已獨不仗生前慎突晨煙進搖鞭紫陌遷
虎牢逢故壘漢楚孰英賢銅駝聞挾彈翁仲立巍然
伊洛天清水梁唐今幾年嶠函西入國潼道扼黃埏
百二山河壯英雄在守焉至老經遙涉曾開意自便
人情偶相合相離更何言我不能人教卿當自勉旃

鍾山賡吳沉韻

峩峩倚空碧環山皆拱伏遙岑如劔戟邇洞非茅屋
青松秀紫崖白石生玄谷巖畔毓靈芝峰頂森神木
時時雨風生日日山林沐和鳴盡啼鶯善舉皆飛鶴

山中道者禪隴頭童子牧試問幾經年峇云常辟穀
白鶴日間朋黃猿夜中僕萬歲神仙榮千秋凡人祿
無知甲子壽但覺年數福彩雲出洞中鴻濛山之麓

又賡戴安韻

旭日射山巖嵐光加翠色鳴鳳在高柯育雛傍崖側
風來楸葉紅寒鴈起塞北江流護周迴天澄雲影碧
磅礴氣氤氳鴻濛太古積靈秀峙峩峩仰瞻常晨夕
倚天來何時孰謂題名籍朱湖洞中仙蟠桃徑一尺

又賡谷祿與權韻

時雨濟八荒萬物皆精爽遙岑歛白雪巖壑盡軒敞

啼鶯舞林麓民樂更何想樹底清風生花馨送至往
野人入市沽沽畢還山上庶士問民瘼王綱仁義掌
智人若峰巒天下有所仰埋雲疊嶂松微音琴撫響

天竺僧

比丘乾竺來情思脫禍胎去鄉十萬里飛錫不塵埋
宵晝觀孰大無時不常懷志立無上等必欲精神諧
忽然觀身影影乃與身偕若欲離塵垢將影與身排
再觀世萬物有形必影該尋思欲解分似乎與理乖
空寂如是說咸將貝葉開論影始太古至今尚猶猜
日午難迴避臨水見眉腮月下偏分曉愚云似恠哉

智人果解分禍胎兩忘災或說身裁影亦曰影身裁
顛倒論常世倒顛日日俳觀倦身意馬勞心猿似豺
到了難分去從伊子細差閉門終不見出戶倚身牌
有時定玄機俯仰何根荻祖佛如何定影子在塵埃
爾昇從爾上爾降從爾階躊躇從躑躅穿履亦穿鞋
反復誠難避簪花猶插釵虛實誰參透天厨一供齋
八萬四千戶閭閻通榭臺雞犬聲無異莊周化骨骸
漆園曾作吏槐國已知槐幻中生幻夢幻影與身衰
影幻身亦幻何時有吐衰若欲常寂靜百骸與之齊
智慮渾忘却天然似嬰孩

賡僧韻

天台五百尊方寸皆明月月影彌大千江何曾有暫歇
爲斯妙用通今古長不滅昔當懸挂時誠非凡可越
住世及應真幾度阿僧劫假錫作梯航泛海濤如雪
一旦杳無蹤暫與沙鷗別儵忽群禪中孰能爲機泄
禪心曠無跡如海亦何竭僧本具他心宗門常合轍
善世禪師遊方歸朝

前年拜辭去今春二月歸未聞湖海闊但見禪眸輝
踏雪來朝覲家風祖佛規默坐各無語方寸究徘徊
櫻花纔臉笑柳眼正舒眉獨翁任清淨愚俗多險危
姦狡不善死到處冢纍纍爾心鑑此患棄家永不回
年年常作客如蓬被風吹哀憫自天祐仁深久必爲
切記無住相與佛莫相違

寶光廢塔

寶塔摩青蒼招提歲久荒秋高棲俊隼夜深月影長
寂寂星搖蕩飛雪入棟梁守僧都去盡螢火作燈光
鬼哭思禪度遺經風日張獨有來巢燕呢喃似宣揚
停驂傷古意雲合草頭黃聞說當年盛鐘魚徹上方

歌行

賡僧錫杖歌

由來震旦始乾竺扶老應須棲此杖鈴鈴琅琅妙且
奇撼振一聲空谷響或時化作飛龍威長空如水何
相持有時比翼論端的方覺玄關顯現時志悟未通
心委曲鴻濛渾沌同塵俗驀然一悟凌煙霞覺此覺
他方意足神眸昭昭衆生顧隱隱微微如法故每擔
日月猢猻藤篋食由來飽祇樹

寺中猫食肉

緊行慢行皆虎形室中捕鼠百般能精舍一隙透靈
鼠朽殘經卷將何補為斯育爾佛釋迦日逐隨僧常
茹素常茹素一旦筵前舒爪距爾勤爾役誠可錄賞

彼丹衷命食肉

春日鍾山行

我愛山松好雲埋常不老幾度春風吹更綠勝似蓬
瀛美三島石徑開巖壑流泉嫩春草草青啼鳥澗邊
幽玄鶴摩空來晨早錦衣隊列出山阿飲客婆娑歸
更飽山清水清我亦清有秋足我斯民寶

倭扇行

滄溟之中有奇甸人風俗禮奇尚翫捲舒非距亦非
規列陣健兒首投獻國王無道民為賊擾害生靈神
鬼怨觀天坐井亦何知斷髮斑衣以為便浮辭嘗云

齊服多捕賊觀來王無辨王無辨褶袴籠髻誠難驗
君臣跣足語蛙鳴肆志跳梁干天憲今知一揮掌握
中異日倭奴必此變

高皇帝御製文集卷第十九

高皇帝御製文集卷第二十

五言律詩

望鍾山

壘嶂盈門實虛看滿座雲霓闌松氣濕俯宸篆煙伸
鶯轉聲來耳風催馨襲人近山佳景盛彤殿盡良臣
題老君廢廟

廟古鴉昏集遙瞻起敬心路幽人跡杳碑偃草叢深
度關先紫氣去後永淪沉惟有庭前樹多年茂作林
五言排律

長江潦水詩賡吳伯宗韻

炎蒸和氣淳化水亦無渾出峽飛輕雪湍山潤厚坤
蟄蛟從此出浮鷺亦斯奔旋轉如深井轟流瀉巨盆
連雲龍氣躍振木虎情蹲浩蕩彌十樹鴻濛印萬村
影搖咸浪合光射集雲屯尾尾穿波鯉揚揚透霧鯤
逶迤洪海口委曲大龍門汗漫無知已汪洋實的存
沛然清宇宙廓爾豈晨昏汨汨涼隆暑人間潦水尊

七言律詩

鶯轉皇州 二首

絮飛鶯轉柳垂青春雨過時天正晴新澗水流聞鼓
韻舊崖松掃聽琴聲神州氣象寰中盛天闕風光世

上明猶有上林花似錦殿階仙樂鳳笙鳴

又

禁城新柳葉成帷隱映黃鸝深處啼晴蝶逐風翻上
下晨雞閱日唱東西華衢紫陌人煙盛繡戶朱門燭
焰低景物美看茶酒肆粉鈿遙擁坐輕蹄

詠京師

臣民推戴號神京嘆息驅馳行伍行轉戰群雄機尚
記帥征英俊量方平如今已足勲功賞向後無知孰
末名暇日試將銅鏡照烏髭堪比玉垂纓

詠唐陶將軍率舟師

昔人奉命駕兵船爲國精忠突曉煙令出三軍憑戰
鼓呼來萬馬仗龍泉相加若肯存生意比並何須用
着鞭必定清塵要服外收功應達九重天

詠柳州城戍守

城居邊徼壘遐荒煙瘴盈眸癘氣茫旦暮海風搖屋
樹春秋溪水泛籬墻思軍久戍炎蒸地必將巡防熱
中腸但願昊穹舒造化洗清鬱結利同鄉

詠南越

邊邑深隍嵌疊峰上民食粟扣時春雲山溪水常川
合煙樹藤蘿每自封嶺外瘴溫鳴蟋蟀海濱鬱熱

鱖鱖常思不律皆由此數月朱顏別舊容

諭臨蒸縣官

臨蒸邑治絕遐方截業重山碧翠行溪曲羊腸嵐雜
霧樹蟠龍體雨飛湯墨雲隙處天澄水蒼海空中日
曜陽好把寸心問民瘼當遷離瘴任瀟湘

聞人嶺南郊行

極目山雲雜曉煙女蘿遙護嶺松邊陸行盡服嵐霞
氣水宿類吞虬蜃涎晨仰際峰觀擁日暮看臨海泊
來船信知百越風塵異黑髮人居不待年

思開平下毗陵

徐集文集 卷十
憶昔雄師罷戰灰，開平猶有教軍臺。自從南向北征去，直到如今未不來。思起相從不憚役，想來奮戰愈增哀。有時夢裏還相見，袍鼓聲中旗甲開。

詢洛

洛水宮妃衣絳袍，伊河清碧淨飛濤。千年翁仲長應立，萬古銅駝永不勞。往昔崑函車路闊，當今慈鶴洞雲高。世充罔識天垂象，以致唐皇展豹韜。

盧汀洲隱浦

泛入遙江漸渺茫，蘆花風落雪飛揚。天邊雲影浮舟靜，村外秋光列鴈行。覓隱誰知棲所在，用心無處不

籌量。盧生避世深幽跡，故入滄浪野水鄉。

山滄浪隱谷

野人孤寂萬重山，夜聽猿啼峰頂間。洞口白雲時自長，溪中清水日流湍。柴扉半掩松森處，爐火頻添月色閑。已絕世塵忘俗事，吞霞服氣玩靈丹。

川原和居野

滿目平原桑棗餘，那將田地長青蕪。黃童逐豕隨牛後，白叟乘驢繼馬徂。煙樹半遮村酒旆，雲山常見市廛圖。野人自是無拘束，一日三番醉盡壺。

竹榦青樂釣

御製文集 卷下
曠浦澄天濕曉煙
智人樂釣穩沙前
箬輕雨霽雲收
谷釣擲綸樞水映船
舉棹欲歸江月上
掛帆已近暮
霧邊汀蘆處處飛
螢火照徹漁村飲不眠

牧羊兒土鼓

羣羊朝牧遍山坡
松下常吟樂道歌
土鼓枹時山鬼
聽石泉濯處澗鷗和
金華誰識仙機密
蘭渚何知道
術多歲久市中終
得信吹羊洞口白雲過

巨罟叟漁魚

悠悠江靜日和暄
迥水歌聲度靄煙
漁網布時天上
曬布帆張處斗移邊
風恬喜目遙山嫩
岸濕頻看通

草鮮薄暮欲歸星
月上流螢點點近船舷

橫秋風吹笛

西風落木綻黃花
牛背村童笛正佳
曾識倚樓人聽
處每聞吹月鶴
昇遐蒼江一色渾
秋意紅葉初光襯
曉華冷露下天星
斗潤煙波聲到是誰家

滄浪翁泛海

海天漠漠際無窮
巨艦檣高挾兩龍
帆飽已知風力
勁舵寬方覺水清
雄鰲魚背上翻飛浪
蛟虯鬚頭觸
見虹何日定將歸
泊處也應繫纜水晶宮

莽滄叟歌山

御集文集 卷三
五
仰目巍峰柱上穹千巖萬壑盡玲瓏玄猿嘯月丹崖
側紫燕摩天碧漢中樵牧往來雲樹裏牛羊歸去霧
煙東山中人物常歌道歲歲年年莽蒼翁

擒禽獸伏機

機人設穽欲擒謀利鋏調絃勁弩頭禽獸無知騰躍
進雲霾深處觸嬰收湯仁祝網施洪惠禹智剗山展
大猷今古人情常不一孰將天道與心籌

鍾山雲

踞蟠千古肇豪英王氣葱葱五色精巖虎鎮山風偃
草潭龍噓氣水明星天開萬載興王處地闢千秋永

朕京成以六朝亨替閱前禎禎後後嘉禎

鍾山雲雨

崔嵬萬壑玉籠葱靉靄雲濃雨碧松千古鍾靈佳氣
盛幾年淮秀瑞光萌倚天絕壁參銀漢拔地穹崖搆
梵宮時向望中閑極目神機造化正鴻濛

新春賡王鵬韻

春到陽和萬象舒至陰深歛九泉居山川氣霽堅冰
泮嶽瀆雲生冷露除但向靜中觀造化特專閑裏運
圖書仁聞堯德兼天地大治蒼生惟舜虞

又賡劉仲質韻

陽昇陰降轉洪鈞柳眼初舒造物新
泮却堅冰澄碧海浮遊暖氣拂玄旻
從茲宇宙皆清泰始覺輿圖治
化淳淑鳥嘯音鳴處處弄晴花蝶舞先春

春山新水

山雲靉黳節初暄景色清明春水連
谷鳥喜鳴花沐雨巖猿悅躍樹籠煙
仙家麥飯雲蒸熟旅館薇蕨氣
育鮮最好滿川渾似錦漲溪新水印晴天

春水滿四澤

陽舒陰暢澤盈流不十應當大有秋
春雨花紅林木盛曉晴巖紫氣嵐浮
江臯釣艇蓑翁樂雲谷山人

仗悠麥已蟠科煙禁日呢喃燕語祝臯猷

雨洗山松

四山松栢夕塵連宵雨朝來洗滌鮮
聲聽微風翻碧浪光舒初氣捲青煙
啼猿日悅跳還躍舞鶴雲歸旋
更翻林麓笙簧鶯嘯巧洞仙騎鹿上遙天

雨洗山

初光入暑木陰森遠邇層巒滿林浩蕩薰風至時
雨洗清巖壑爽煩襟天邊浪滾因松綠山外雲飛仗
氣深正是農家耕耨節野田處處盡歌吟

暑霽遙岑

蒸雲歛盡遠山青萬壑涼生宇宙明林影淡搖溪內
水崖光偏映洞邊藤倚欄極目天開盡凭檻吟詩紙
耀皇但把此時觀畎畝筋疲力倦始秋成

嘆秋

碧梧露結曉凝霜蘆葉瀾漫積雪揚鴻鴈翩翩來薄
霧巨魚跳躍下清江風聲落木深秋意雲影垂天印
日陽閑看滿川黃菊菜因蜂搖動暗浮香

設潘宗道送友人歸山東

共到神州獨爾歸相携握手更牽衣秦淮鳥嘯乾坤
泰鍾阜巖生日月輝去此魯田多種粟寧鄉齊地廣

栽薇逢交必諭王綱振率土編氓莫法違

遣使爲大祀犧牲北至齊魯

欽天惟恐不精誠命爾齋符馳驛行淮海濟州連地
闊江河徐邑曠川平智人一目曾懷爽霸業千年帝
道興俗異語殊南北辨由來混一大嘉貞

題隱者

固潔精魂欲上天幽居深處水雲邊煙封遠浦沙鷗
盡樹鎖前山草鹿眠書假管城應復路楮生墨客未
回川逢人更祝堅清志必日雲衢足躡前

雪山寺

極目遙岑起曉煙深埋凝雪梵王禪冰枝老樹彌千
壑納被蒼僧布法筵爲羨浮生會着處好將空寂化
迷遷六年嶺際今猶見行致天花覆八埏

又賡周衡韻

同雲昨夜布長空曉日遙岑白愈豐蓋世銀粧黎庶
戶盈巖玉砌梵王宮漁樵各伎誰容易釋道貪生孰
建功造化亦由人事見十朝一雨五當風

僧目空山

孤寂淒淒一徑微處心應與世塵違朝觀松鶴摩天
去暮見巖猿挽樹歸瓶水一爐香滿座錫鑲丈室氣

盈衣空山僧對知何日化作蒼龍挾雨飛

命板的達穩禪

居山本是出塵埃何爲遊人役已骸晨坐巖前觀日
上暮禪松底聽風來從教市巷笙歌美莫羨閭閻酒
肆諧十二時中香裊篆迎來送往更毋開

題神樂觀道士

仙翁調鶴欲扶穹萬里風頭浩氣雄翎背穩乘空廓
外丹光橫駕宇寰中飛符到處雷神集役劍長驅瀉
鬼窮見說黃芽心地轉更於何趣覓仙宗

雲衲野人

山人脩道幾經年聞說食松足意便時以斷雲完故
衲日將流水灌新田常勤侶鶴巖崖下寂靜儔猿煙
霧邊欲訪未知何處住料應霞舉已成仙

鍾子煉丹

翠微高處渺清煙知子機藏辟穀堅丹鼎鉛砂勤火
候溪雲巖谷傲松年潭龍掣電深淵底崖虎生風迴
洞邊徑已苔蒙人未履昂霄足躡斗牛天

七言絕句

鍾山

翠微突兀倚晴穹日色暄和紫氣濃谷內野猿跳上

下鶯啼悠韻樂三冬

望鍾山白雲二首

鍾山萬疊白雲浮密鎖松梢爽氣流石徑雨痕苔蘚
綠蒼崖根底蟄龍湫

又

萬壑松陰起曉風硃崖雲幕亘長穹應知造化誠難
測項刻靈靈顯至工

鶯囀皇州二首

嫩柳鶯啼三月天園林替錦綠陰鮮乾坤氣集皇州
處景盛人繁勢自然

又
皇州春晚日增輝
旅館延餐賜遠夷
淑氣烏催鳴上苑
篆煙細裊出彤闈

東風

我愛東風從東來
花心與我一般開
花成子結應花盛
春滿乾坤始鳳臺

新雨水

片雲風駕雨飛來
頃刻凭看潤九垓
楹外近聆新水響
遙穹一碧見天開

萍生

性覺先春膚色金
垂青之後漫精英
飛來陸野還成柳
飄入淵池化作萍

思遊寺

雨落黃梅麥已秋
日思精舍夢還遊
晨昏幾度經鐘聽
巖壑雲生出野樓

雨墜應落花賡徐瑛韻

人道春歸實不歸
但知結實蕊枝稀
昨朝一夜如膏雨
正是花成子就時

又賡吳詰韻

時近清和氣愈濃
雨催花實喜晴風
籬邊點點如錢

大盡是青青間綠紅

又賡馬從韻

霏霏颯颯又紛紛致使平原草色新一夜好花都結
子乾坤大地沒埃塵

又賡宋璩韻

清和未至尚春風花幕園林似錦紅細雨只教成子
速盡飛彩蝶最多功

又賡朱孟辨韻

瀟瀟雨灑墜花頻觀地由來似樗茵獨有乾坤能造
化生成萬物最多仁

又賡桂慎韻

好風吹謝實成花糾結飛飛似錦霞志者春光陰寸
惜人生一世幾榮華

又賡劉仲質韻

天地多仁惟好生致令草木結華英因風細雨枝頭
看花已飛時子已成

又賡雨後晴雲賡馬從韻

萬疊晴雲起遠峰舉頭極目見天中江山如畫民安
樂溽暑蒸苗秋不空

暑蒸物盛

殿礎氤氳紫氣生石泉灑灑似流行山蒸海湧薰風
節萬物依時得遂亨

望雨

日望天邊起密雲月常皎潔日常晴憂思禾稿民何
福腹內心煎意有評

齊時雨

暑雨天晴江漢清寰中擊壤賀昇平群卿盡職人風
古省已脩身介

上明

日遠山

雲靄遠山風至雨一簾高揭暑咸收太平無事民康
日正在調和理順秋

青山白雲

四首

凌穹截業翠江邊佳氣氤氳素練纏勢若遊龍直造
化油然縹渺似飛綿

又

雲凝雨後翠張綿隱露遙岑將近天潭水龍吟吹白
浪丹崖穹處暮收煙

又

青山雲靄雪凝枝畫作長生太古詩猿鶴自如巖谷

迥出塵野老本心知

又

鍾山萬木暑陰森巖壑松風奏玉琴溪澗碧流聲韻
美望中佳興致題吟

又饒易毅韻

鍾山洞口綵霞長萬壑雲生濟至陽猿鶴每棲渾意
樂黃旗紫蓋世興王

又賡盧均泰韻

鍾山曙色夏初長巖壑嵐生輔太陽幾度雨餘天一
碧遙岑羅列更非常

山頂白雲

山椒極目白雲崇粧色繽紛百丈松新水瀑岩聞鼓
韻女蘿遙似洞門封

春望牛首

遙岑峙立勢蒼然春聽鶯啼景物鮮疊嶂倚天江月
外三山映帶石城邊

秋日鍾山賡裴植韻

倚蒼羅列數奇峰巖谷雲生萬態谷或爾有時樓閣
見分明一體廣寒宮

詠李白遊洞庭湖

蒼梧山色水何分
碧鏡澄湖杳渺雲
惟有古人堪羨
處湘妃猶自望
虞君

詠李白早發白帝城二首

白帝城高萬疊間
江雲朝出暮猶還
信知千古英雄
地雖險應須德作山

又

謫仙東下入瞿間
一葉扁舟日日還
聞說衝濤千尺
浪兩江極目盡皆山

詠李白秋下荆門

布帆高掛映長空
且喜新秋冷露風
數日輕舟歸似

箭須更繫柳泊吳中

老禪紙帳

樓閣崢嶸半倚天
老禪紙帳晝酣眠
精魂惟識黃龍
劍定省還知叩玉泉

雪詩賡韓文輝韻

陰極陽生墜玉花
飄飄颯颯遍天涯
歌樓酒肆呼茶
急繡戶重裊樂貴家

又賡李睿韻

陰極陽生建至和
飛花滕六玉山阿
從斯瘴癘同雲
捲喜見民人相與歌

又賡曹文壽韻

翩翩飛舞布田垓似絮還疑玉藥梅一夜撲窓春蝶
戲好風吹去又堆來

又賡張翼韻

臘前三白曠無涯應是天公降六華九曲河深凝底
凍張騫無處再乘槎

寺掩山深二首

絕跡高人隱翠岑山連疊嶂白雲深欲經無覓通人
處時忽林風送磬音

又

見說山中了道僧不聞鍾鼓不聞經
朝觀樹頂香煙裊暮識禪機一鏡明

又賡馬懿韻

山深樹密嵌幽巖僧舍清虛門鎖嵐
有客問禪無覓路已知出世不同凡

雲山僧寺

雲籠紫翠槩鴻濛洞口風生度梵鍾
我欲叩禪閑問道老僧心地與天通

又賡吳況韻

天生倚碧吐雲奇巖窅隆峰萬古宜
谷內野人機面

壁從前甲子了無知

鍾山僧寺賡單仲右韻三首

遊山必是叩僧禪聞說神僧透宿緣
綠山果玄猿搖綠樹方知入定是金仙

又

精藍幽谷寺差我風過松聲韻
碧波寂寞出塵天外景驪騮雜逸意奚何

又

山勢峻嶒谷隱僧六通具足勢層層
鵠巢冠頂忘機處午夜明星識已能

飛鳥化鳥

幻化由來顯妙工幕天席地自從容
還知飛鳥成雙鳥猶且同塵入窻中

仙人

仙人鶴背幾經秋神出塵寰宇宙游
鐵笛橫吹天地外肯將精氣渾茫儔

天界寺春雀

春風夜雨沐花妍曉霽簷前雀噪喧
孰謂可知機裏事飄然翕翮舞長天

曆祀太朴韻

御製文集 卷二
花逢夜雨曉看妍
實蓋凋時堦不喧
試問老禪幽得處
謂言物外有青天

神樂觀道士

聞說仙人豈等閑
年年辟穀鍊金丹
虛心盡却玄中覽
特役絃歌謁

帝壇

高皇帝御製文集卷第二十

御製文集後序

御製文集五卷論記詔序詩文凡若干篇翰林學士臣樂韶鳳
宋濂等之所編錄臣劉基謹拜稽首讀畢而為序曰臣聞自古
帝王之德之美見乎外者文與武也惟上聖為能兼焉故天下
無事則以制禮作樂布政施令民之望之但見其光輝昭著如
日月之照臨於是乎名之曰文天下有事則以誅暴伐亂植善
覆惡民之望之但見其威勇奮發如雷霆之震迅於是乎名之
曰武文也武也同出于一人也是故益贊帝堯則曰乃武乃文
周公賦詩以歌誅文王則盛稱其遏毘夷伐崇之事此聖人所
以超乎萬物之上可望而不可及者歟欽惟

皇帝提一旅之衆龍飛淮甸芟翦群雄

命將四征

神謀妙筆悉出

宸衷動無遺策是以不十年間奄有區宇玄黃之所覆載罔不臣妾自古以來武功之盛未之有也及夫

萬幾之暇作為文章舉筆立就莫不雄深宏偉

言雅而旨遠至于

詔諭遐方明燭萬里若洞見其肺腑真所謂

天生聰明可望而不可及者矣臣基蒙

恩獲陪侍從親覩其盛因思書詩所稱古昔帝王兼全文武者誠非溢美故孟子曰前聖後聖其揆一也由今觀之豈虛語哉
洪武七年歲在甲寅冬十二月甲寅資善大夫誠意伯臣劉基
拜手稽首謹序

歷代聖王同道而治天下者惟文武二事也粵自庖犧氏觀河
圖畫八卦人文宣朗之後於斯二事能臻其極則二帝三王而
已耳故書為王者之言典謨訓誥之文赫如日月照耀今古其
紀堯之德曰欽明文思又曰乃武乃文紀舜之德曰濬哲文明
紀禹之德曰文命敷于四海其所由來尚矣湯武雖以征伐得
天下然偃武修文述作彌盛蓋天生聰明睿智為君為師以上
達造化之理下窮事物之源吐辭為經舉足為法行之為道德
措之為事業發之為文章此全體該貫雖萬殊而一致也自漢
而下興王代作然文經武緯一弛一張率不能兼齊其美惟唐
太宗以兵力定權亂及踐阼之後詞章奮發動成巨帙論者以
其雕奇鏤恠徒與騷人韻士爭錙銖之巧而不能有帝王氣象
我

皇上乘炎精之運龍興中土以一旅取天下於群雄之手不數年間混一南北溪蠻海夷文身卉服罔不來庭當命將出師一以禮樂從事惟武功之盛由三代迄今未能或之比也然自

臨馭以來雖萬幾之際未嘗不游心乎道學存志乎詩書是以匡飭臣庶或詔諭邊方輒寓辭竹帛親擗奎翰意無停機一揮而數千百言群臣環視靡不警服若設諭省頌紀夢等篇與典謨訓誥寔相表裏及先詞雅什助宣聲教者粹然一出于情性之正侍臣錄之九五卷其爲文也去浮靡之華惇淳古之本爛乎與日星同其耀也風雲同其變也河嶽同其高深也大章韶濩同其奏也浩乎與江海同其波汗漫汪洋莫能窺其涯涘也冲乎與陽春同其和煦而草木得以遂其生也蓋天地精英之氣必鍾於聖人而下飾萬物者其不在茲乎其不在茲乎傳曰

其有成功也煥乎其有文章前聖後聖同歸一揆然則仲尼之言豈專美于有唐而已哉臣傳叨任載言幸朝夕侍

左右每以是集拜捧而讀之尋繹吟玩其

弘謨睿訓淹貫於耳目久矣欽惟

天才英邁

聖體純穆不耽於聲色之好絕遊畋之娛涵養冲素蓄之厚者施必溥源之澄者流必清故其發於外者其盛大光明有如此而

上猶以爲未至也欲其贊而翰林學士承旨臣詹同等固請宜鈇諸梓以貽

聖子神孫俾有矜式於戲夫聖賢文武鴻業作於數千載之前尚跋而慕之思見其人斯文也傳於數千載之下將使來者又思慕之不已况今出入

禁庭親薰而炙之安得有不爲榮幸而感發於中耶苟因是言
得附名卷末亦間世之希遇云

洪武七年歲在甲寅冬十二月乙卯承事郎起居注臣郭傳拜
手稽首謹序

恭題

御製文集後

臣聞有德者必有言蓋有德者和順積中英華發外無非天然
之文不待勉強而後成譬猶大化流行融液通暢而萬物發舒
各得生生之妙精神充衍無往不在故大舜作五絃之歌湯爲
盤銘武王造起居之誠皆粲然成文此揚子雲所謂聖人之言
炳若丹青也恭惟

皇帝陛下統御以來用人文化成天下

睿訓諄復惟恐一夫不獲其所

天縱聖能形諸篇翰奎璧照耀層霄絢采光被上下萬象動色
然而建中于民寤寐弗忘則有虞阜財解愠之歌也夙夜修省
常如神明森列左右則湯武盤杆几杖之銘也仁民愛物之心

隨感而見布于方策溫潤淵深統貫乎斯道光芒氣皎蓋履平
六合前聖後聖實異代而同符也臣供奉詞林幸日侍
几硯仰瞻

揮灑之際思若淵泉頃刻之間煙雲盈紙有長江大河一瀉萬
里之勢跪捧而觀殷彝周鼎未足喻其古也太山喬嶽未足喻
其高也風霆流行未足喻其變化也蓋由

天德粹純無聲色之好無遊畋耽樂之從聚精會神凝思至道
形於心聲同功造化非語言形容之可盡也且當

萬幾之暇時

御翰墨多不留彙見於侍臣之所錄者得若干篇臣竊以爲日
星昭回于天下飾萬物蒼生無不仰照

聖皇之文猶日星也是宜刻于文梓流布四海使見之者咸獲味嘆

文明之化熙熙皞皞相與率德勵行以爲忠孝之歸豈不盛哉
於是敬錄上文與詩凡五卷續有制作復編類爲後集云翰
林侍講學士中順大夫知制誥同修國史兼太子贊善
大夫臣宋濂拜手稽首謹書



恭題

高皇帝御製文集後

翰林學士臣樂韶鳳等輯

高皇帝詩文五卷近滇南刻本二十卷卷目不與韶鳳等輯同臣九臯
理齋維揚瞻近

商邑咨考文獻竊嘆我

高皇帝德業之盛沕溘湛濊配合穹顯邈乎不可尚已而

綸綍章翰賁飾萬物掩薄典誥昭回日月後世蓋罕儷焉所謂
巍乎其有成功煥乎文章者也顧文集播傳未廣天下臣庶思
欲仰睹

天地之撰日月之光者咸有慊志會提學御史臣聞人詮以滇
本遺臣謂宜重鈔諸梓臣乃檄江都知縣臣王惟賢刻焉惟賢

復構得甲乙丙丁四集間多前集所未登錄蓋當時侍從文學
之臣各自纂記以故篇次不倫臣乃躬自讐校互相補除合六
百七十二篇仍分爲二十卷第錄如上昔吳季札論舜樂謂如
天之無不覆也如地之無不載也雖甚盛德蔑以加矣其茲集
之謂乎

嘉靖十四年冬十二月戊寅巡按直隸監察御史臣徐九臯拜手
稽首謹書





